



Skýrslur formanna stjórnar  
og barna- og unglingaráðs  
Körfuknattleiksdeildar Vestra  
starfsárið 2019-2020

## Starfsemi stjórnar

Á síðasta aðalfundi KKD. Vestra voru eftirtalin kjörin í stjórn: Ingólfur Þorleifsson var kjörinn formaður. Birna Lárusdóttir, Ingi Björn Guðnason, Helga Salóme Ingimarsdóttir og Harpa Guðmundsdóttir sem aðalmenn. Til vara voru kjörnir Birgir Örn Birgisson, Gunnlaugur Gunnlaugsson og Sveinn Rúnar Júlíusson. Á fyrsta fundi skipti stjórn með sér verkum og var Harpa kjörin gjaldkeri og Ingi Björn ritari. Aðalstjórn fundaði eftir þörfum á tímabilinu. Mál voru einnig unnin í gegnum samfélagsmiðla og tölvupósta líkt og undanfarin ár. Stjórn skipulagði fjáraflanir og hélt utan um rekstur meistaraflokks karla. Frá miðjum mars fór starfsemi stjórnar eingöngu fram í gegnum samfélagsmiðla og Zoom forritið vegna Covid-19

Helstu fjáraflanir ársins voru, líkt og áður, vinna á grundvelli samstarfssamnings Ísafjarðarbæjar við HSV vegna 17. júní hátíðarhalda og flugeldahreinsun, vinna við körfuboltaþúðir Vestra, klósettpappírsla, vinna við hópeflisdag Ísafjarðarbæjar og útskrift MÍ ásamt fleiri smærri fjáröflunum.

Fulltrúi stjórnar mætti á tvo formannafundi á vegum KKÍ á tímabilinu. Annar var í gegnum Zoom forritið en hinn í íþróttamiðstöðinni í Laugardal.

## Meistaraflokkur karla 2019-2020

Yngvi Páll Gunnlaugsson yfirþjálfari Kkd. Vestra lét af störfum í lok 18-19 tímabilsins. Hann hafði þá stýrt liðinu í þrjú ár og eru honum færðar bestu þakkir fyrir samstarfið.

Stjórn ræddi við nokkra aðila óformlega áður en farið var í samningaviðræður við erlendan þjálfara. Þær viðræður skiluðu ekki tilsettum árangri. Um líkt leyti og þeim lauk kom óvænt upp að fyrrverandi þjálfari og leikmaður okkar, Pétur Már Sigurðsson, losnaði úr sínu starfi hjá Stjörnunni og náðust samningar við hann fljótt og vel um að taka við sem þjálfari meistaraflokks karla hjá Vestra. Síðar var Baldur Ingi Jónasson ráðinn sem aðstoðarþjálfari með Pétri.

Leikmannahópur meistaraflokks taldi að jafnaði 14-15 leikmenn. Liðið æfði eins og áður á Torfnesi og í Bolungavík.

Liðið var skemmtilega samsett af reynslumiklum leikmönnum og ungum heimamönnum. Það tók smá tíma að slípa mannskapinn saman og nýjan þjálfara að koma sínum hugmyndum inn. Þegar Íslandsmótið var blásið af um miðjan mars vegna Covid-19 hafði liðið unnið 7 leiki af síðustu 8 og tryggt sér sæti í úrslitakeppni 1. deildar. Þegar tímabilinu var lokið var ljóst að einhverjar breytingar yrðu á leikmannahópnum fyrir tímabilið 20-21. Þeim leikmönnum sem nú hverfa frá borði er þakkað fyrir sitt framlag og óskað velfarnaðar á nýjum slóðum. Þar ber vissulega hæst að fyrirlíði okkar Nebojsa Knezevic hefur samið við Skallagrím í Borgarnesi eftir 7 tímabil á Ísafirði.

Stjórn samdi við Pétur Má um að stýra liðinu áfram á komandi tímabili og hefur hann í samstarfi við stjórn þegar hafið viðræður við leikmenn og ganga þær viðræður vel. Nú í maí hefur meistaraflokkur karla verið skráður í Íslandsmót, bikarkeppni og deildarbikar á vegum KKÍ á komandi tímabili.

Eftirtaldir voru í meistaraflokkshópnum á tímabilinu 2019-20.

Blessed Parilla Bakvörður  
Egill Fjölnisson Framherji  
Friðrik Heiðar Vignisson Framherji  
Helgi Bergsteinsson Bakvörður  
Hilmir Hallgrímsson Bakvörður  
Hugi Hallgrímsson Framherji  
Ingimar Aron Baldursson Bakvörður

James Parilla Bakvörður  
Krzysztof Duda Framherji  
Marko Dimitrovic Framherji/Miðherji  
Matic Macek Bakvörður  
Nebojsa Knezevic Bakvörður  
Nemanja Knezevic Miðherji  
Toni Jelenkovic Bakvörður (kom um áramót)  
Þorleifur Hallbjörn Ingólfsson Bakvörður



## Veturinn hjá meistaraflokki karla

Liðið lék 22 leik í deildarkeppni og sigraði í 14 leikjum og tapaði 8. Takmarkið fyrir tímabilið var eins og árið áður að komast í úrslitakeppni 1. deildar og náðist það. Niðurstaðan var sú að liðið endaði í fjórða sæti þegar mótið var blásið af. Það voru mikil vonbrigði að ekki var leikin úrslitakeppni þetta vorið. Liðið var á mikilli siglingu og átti góða möguleika á að tryggja sér sæti í úrvalsdeild.

Stjórn studdi þó heilshugar allar aðgerði KKÍ á þessum fordæmalausum tímum og fór í einu og öllu eftir tilmælum yfirvalda. Ljóst að er að félagið verður fyrir umtalsverðum tekjumissi vegna þess að mótið var blásið af. Vonir standa til að eitthvað af því komi til baka frá ÍSÍ, en aðalstjórn Vestra hefur með höndum að skipta bótum til undirdeilda sinna.

Liðið spilaði í Geysisbikarnum og sat hjá í 32 liða úrslitum. Í 16 liða úrslitum dróst liðið gegn úrvalsdeildarliði Fjölnis úr Grafarvogi á heimavelli á Torfnesi. Þar var úrvalsdeildarliðið aðeins of sterkt og sigraði 68-85. Þess ber þó að geta að besti maður Vestra, Nemanja Knezevic var fjarverandi vegna meiðsla og munaði um minna.

Veturinn var einn sá erfiðasti í mörg ár til ferðalaga. Oft þurfti að fresta leikjum, bæði heima og heiman, einnig þurfti liðið að gista oft eftir útileiki en oft áður. Einu sinni þurfti svo að kalla eftir björgunarsveit til að sækja okkar menn er þeir sátu fastir og er björgunarsveitarfólki á Hólmarvík færðar bestu þakkir

fyrir hjálpinu. Það má alltaf búast við að röskun verði á starfi sem fram fer yfir háveturinn á Íslandi. Töluverð umræða skapaðist inna körfuknattleikshreyfingarinnar vegna frestunar leikja á tímabilinu. Við teljum að þar eigi að ráða almenn skynsemi en ekki hentistefna. Þetta er jú bara leikur og ekki nokkur ástæða til að stofna mannlífum í hættu að óþarfa.

Öllum leikmönnum og þjálfurum meistaraflokks karla eru færðar bestu þakkir fyrir samstarfið á tímabilinu.

## Meistaraflokkur kvenna 2020-2021

Stjórn hefur um langt skeið stefnt að stofnun meistaraflokks kvenna. Í byrjun maí var ákveðið að kanna hug iðkenda og foreldra með það að markmiði að tefla fram meistaraflokki á komandi tímabili. Fundað var með elstu iðkendum í stúlknaflökum félagsins þar sem stjórn kynnti áform sín. Þar var jafnframt tilkynnt að Pétur Már yrði þjálfari meistaraflokks kvenna ef af stofnun hans gæti orðið. Niðurstaða þeirra samtala var jákvæð og er nú svo komið að stjórn hefur skráð liðið til keppni í 1. deild Íslandsmótsins og sömuleiðis bikarkeppni KKÍ. Unnið er að mönnun meistaraflokksráðs. Síðast var starfræktur meistaraflokkur kvenna í körfubolta leiktímabilið 2014-2015 og þá undir merkjum KFÍ. Hér er því um að ræða fyrsta meistaraflokk kvenna í körfubolta hjá Vestra og eru það gleðileg tímamót.

## Að lokum

Stjórn vinnur stöðugt að því að finna fjármagn í rekstur félagsins og mun þeirri vinnu aldrei ljúka. Við höfum verið heppin að eiga nokkra stóra styrktaraðila sem hafa staðið þétt með okkur og gera vonandi áfram. Einnig er fjöldi af smærri styrktaraðilum sem eru ekki síður mikilvægir. Allt þetta gerir það að verkum að við getum haldið áfram að bjóða uppá samkeppnishæfan körfubolta á Vestfjörðum. Það er hægt að líkja vinnu stjórnarmanna við rekstur á litlu fyrirtæki í sjálfböðavinnu. Okkur hefur tekist ágætlega að skipta verkum niður á stjórnarmenn. Ég vill þakka samstjórnendum mínum fyrir þeirra miklu vinnu í vetur.

Kkd. Vestra á marga mjög góða sjálfböðaliða og færi ég þeim öllum bestu þakkir fyrir þeirra ómetanlegu störf. Á tímabilinu náðum við aðeins að stækka hópinn og er það von mín að það haldi áfram. Það er ljóst að til þess að körfuboltastarf haldi áfram á svæðinu þarf nýtt blóð að koma reglulega inn í félagið.

Fyrir hönd stjórnar Kkd. Vestra vil ég þakka öllum þeim sem komið hafa að starfinu á síðasta starfsári og hafa ekki fengið þakkir nú þegar fyrir þeirra ómetanlega framlag.

Suðureyri 31. maí 2020

Ingólfur Þorleifsson  
formaður Körfuknattleiksdeildar Vestra

## Yngri flokkar Kkd. Vestra 2019-2020

Barna- og unglingaráð Kkd. Vestra (BUR) veturinn 2019-2020 var skipað eftirtöldum einstaklingum: Birna Lárusdóttir, formaður, Guðfinna Hreiðarsdóttir, gjaldkeri, Heiðrún Tryggvadóttir, ritari, Dagný Finnbjörnsdóttir, Elísabet Margrét Jónasdóttir, Hörður Snorrason, Halldór Karl Valsson og Lilja Debóra Ólafsdóttir.

Skýrsla þessi nær yfir tímabilið júní 2019 til júní 2020.

## Umfang yngri flokkanna

Æft var í 11 yngri flokkum í vetur:

- Krakkakarfa stúlkur 1.-2. bekkur
- Krakkakarfa drengir 1.-2. bekkur
- Minnibolti yngri stúlkur (3.-4. bekkur)
- Minnibolti yngri drengir (3.-4. bekkur)
- Minnibolti eldri stúlkur (5.-6. bekkur)
- Minnibolti eldri drengir (5.-6. bekkur)
- 7.-8. flokkur stúlkna
- 7.-9 flokkur drengja
- 10. flokkur stúlkna
- Stúlknaflokkur
- Drengjaflokkur

Níu flokkar tóku þátt í Íslandsmótum í vetur:

- Minnibolti eldri (MB10) stúlkur
- Minnibolti eldri (MB11) stúlkur
- Minnibolti eldri (MB11) drengir
- 7. flokkur stúlkna
- 8. flokkur stúlkna
- 9. flokkur drengja
- 10. flokkur stúlkna
- Stúlknaflokkur
- Drengjaflokkur

Í yngstu aldurshópunum var, líkt og undanfarin ár, lögð áhersla á tvö minniboltamót félaga. Fyrri mótið var Sambíómót Fjöltnis í byrjun nóvember og hið seinna átti að vera Nettómótið í Reykjanesbæ í byrjun mars. Nettómótið var hins vegar slegið af daginn fyrir mót vegna Covid-19. Þá voru allir keppendur Vestra komnir á suðvesturhornið. Haldið var eitt innanfélagsmót í febrúar fyrir 1.-6. bekk (Hamraborgarmótið). Til stóð að halda annað innanfélagsmót, Húsasmiðjumótið, fyrir sama aldurshóp í lok apríl en af því varð ekki vegna Covid-19.

## Íþróttaskóli HSV

Aðkoma Kkd. Vestra að íþróttaskóla HSV var takmörkuð á þessu tímabili. Bent var á mögulega þjálfara en HSV hafði síðan beint samband við einstaklinga sem ekki voru þó beint á vegum deildarinnar. Brýnt er að Kkd. Vestra og HSV meti starfsemi og árangur Íþróttaskólans með tilliti til þess takmarkaða tíma sem körfuboltinn fær í skólanum. Grunnhugmyndafræði skólans er jákvæð og félagið hefur til þessa stutt starfsemi hans en skólinn þarf að vera í stöðugri endurskoðun. Töluvert vantar upp á að starf skólans sé metið með markvissum hætti. Gæta þarf þess að hagsmunir Kkd. Vestra séu tryggðir þannig að eðlileg nýliðun geti átt sér stað hjá félaginu.

## Aðstaða yngri flokkanna

Langflestar æfingar yngri flokkanna fara fram á Torfnesi en einnig er æft á Austurvegi og í Bolungarvík þar sem deildinni er ávallt vel tekið. Bolungarvíkurkaupstaður fær sérstakar þakkir fyrir frábært samstarf á umliðnum árum. Lítið hefur verið um æfingar hjá deildinni í minni byggðakjörnum Flateyri, Suðureyri og Þingeyri en nú er íþróttahúsið á Þingeyri orðið það vel búið að hægt er að nýta það til keppni í yngri flokkum. Ný klukka er í húsinu og nýjar körfur væntanlegar. Þessar betrubætur bæta til muna aðstöðu yngri flokka til æfinga og keppni. Húsið hefur verið nýtt til mótahalds.

Fyrir tveimur árum benti Kkd. Vestra á að mikil þörf væri á því að koma upp betri félagsaðstöðu fyrir börn og unglíngla í íþróttahúsinu á Torfnesi. Iðkendur koma úr öllum þéttbýliskjörnum bæjarins og Bolungarvík og þurfa oft að bíða í lengri og skemmri tíma, bæði fyrir og eftir æfingar. Ekkert bólar á lagfæringum sem þó hafa verið boðaðar en brýnt er að vel verði staðið að þeim og þær gerðar þannig úr garði að sómi verði að.

Brýnt er að koma upp nýjum útikörfuboltavelli við Torfnes. Sá gamli er úr sér genginn og uppfyllir ekki nútímakröfur. Í Covid-ástandinu kom glögglega í ljós hve nauðsynlegt er að hafa aðgang að góðri aðstöðu utandyra. Einnig er mikilvægt að bæta útikörfuboltaaðstöðu í Holtahverfi og í minni byggðakjörnum bæjarins.

## Innanfélagsstarfið

Síðastliðið sumar voru sérstakar **sumaræfingar** skipulagðar að afloknum Körfuboltaþúðum Vestra 2019. Æfingar voru ætlaðar eldri iðkendum og var æft þrisvar í viku að undanskildum júlí. Krökkum í verðandi 1.-4. bekk bauðst að koma á tvö **sumarnámskeið**, í júní og ágúst, sem hvort um sig samanstóð af klukkustundarlöngum æfingum í fimm daga.

Vetrarstarfið hófst með **Körfuboltadeginum** í byrjun september. Þar var starfsemi yngri flokka og æfingataflan kynnt og brugðið á leik með leikmönnum meistaraflokks karla. Körfuboltadagurinn í upphafi vetrar er einn besti vettvangurinn til að bjóða nýja iðkendur velkomna og kynna þá fyrir starfi félagsins.

**Hamraborgarmótið**, minniboltamót meistaraflokks Vestra og Hamraborgar, fór fram 10. Febrúar ætlað iðkendum í 1.-6. bekk. Mótið er hugsað sem upphitun fyrir Nettómótið.

## Covid-19

Um miðjan mars varð Covid-19 til þess að allt starf yngri flokka körfunnar stöðvaðist, jafnt æfingar sem keppni. Engar fjáraflanir voru haldnar, hið árlega Páskaeggjamót féll niður sem og kökufjáröflunin á skírdag. Ekki varð af keppnisferð 8. flokks stúlkna og 9. flokks drengja á Götaborg Basketball Festival sem fyrirhuguð var í maí. Stefnt er á mótið að ári. Æfingar grunnskólabarna hófust aftur með eðlilegu sniði 11. maí en iðkendur á framhaldsskólastigi máttu bíða til 25. maí eftir því að hefðbundnar æfingar hæfust á ný. Æfingar eldri iðkenda og fullorðinna máttu fara fram frá 11. maí en þær voru háðar miklum takmörkunum og ekkert spil leyfilegt.

**Vorhátíð yngri flokka** verður haldin 12. júní á Torfnesi með pylsuveislu og viðurkenningum til iðkenda. Kemur hún í stað hinnar árlegu uppskeruhátíðar sem alla jafna er haldin í maí. Þrátt fyrir Covid-19 verður reynt að hafa vorhátíðina með sama sniði og uppskeruhátíðina.

**Körfuboltaþúðir Vestra** áttu að fara fram í júní að venju en vegna Covid-19 var þeim frestað til 6.-11. ágúst. Það eru tólfstu þúðirnar. Undirbúningur er kominn vel á veg og eru þúðirnar orðnar fullsetnar.



## Þjálfarahópurinn

Dagný Finnbjörnsdóttir var ráðin umsjónarmaður yngri flokka deildarinnar í haust og þjálfaði einnig stúlkur í 1.-4. bekk. Aðrir fastir þjálfarar voru: Pétur Már Sigurðsson, Gunnlaugur Gunnlaugsson, Nebojsa Knezevic og Nemanja Knezevic, Matic Macek og Sigríður Guðjónsdóttir og Helga Salóme Ingimarsdóttir. Einnig leysti Aleksandar Tasev mikið af í vetur auk þess sem tilfallandi þjálfarar leystu af þegar þurfti.

Aðstoðarþjálfarar voru í stærri hópum og komu þeir úr röðum elstu iðkenda okkar en lögð er áhersla á að elstu iðkendurnir spreyti sig í þjálfarahlutverkinu. Eiga þjálfarar deildarinnar miklar þakkir skilið fyrir fagmennsku, alúð og eftirfylgni í þjálfarastörfum sínum.

## Foreldrasamskiptin

Öll foreldrasamskipti yngri flokka Kkd. Vestra fara fram í lokuðum Facebook hópum auk þess sem deildin er með opna síðu undir heitinu „Körfuknattleiksdeild Vestra - yngri flokkar“. Allt fréttatengt efni fer þar inn ásamt því að heimasíða Vestra er vel nýtt. Miðað er við að iðkendur í 8. flokki og eldri séu einnig inni á síðunum.

Sérstakur tengiliðahópur er á Facebook en þar í eru allir tenglar hinna mörgu æfingahópa deildarinnar - alls um 25 manns. Gera þarf mun betur í því að virkja þennan hóp. Þörf er á frekari uppfræðslu um hlutverk tengiliða og miðla þarf betur af reynslu þeirra sem best þekkja til í skipulagi ferða og uppákoma svo að nýir foreldra þurfi ekki í sífellu að finna upp hjólið.

Brýnt er að foreldrar gefi í auknum mæli kost á sér í sjálfboðaliðastörf innan deildarinnar s.s. í barna- og unglingaráð, stjórnarstörf, framkvæmd körfuboltabúða og önnur verkefni sem þarf að inna af hendi til að halda úti þróttmiklu íþróttastarfi fyrir börnin okkar. Hér sannast máltækið „Margar hendur vinna létt verk“.

## Uppbyggingarstarfið

Körfubolti nýtur töluverðra vinsælda á landsvísu um þessar mundir og er kjörið að nýta þann meðbyr til að efla nýliðun í yngstu hópunum. Slíkt kallar á gott kynningarstarf með haustinu. Nauðsynlegt er að huga enn betur að þjálfunarþættinum samhliða kynningarstarfinu en félagið þarf á mörgum öflugum þjálfurum að halda ef standa á undir fleiri yngri flokkum. Liður í því er að hvetja eldri iðkendur til að sækja þjálfaranámskeið sem í boði eru á vegum ÍSÍ og KKÍ. Ljúki þjálfari námskeiði greiðir BUR námskeiðsgjöldin. Námskeiðin veita einnig einingar í framhaldsskólum og eru þannig enn frekari hvatning. Nokkrir ungir þjálfarar hafa þegar nýtt sér þetta. Einnig er mikilvægt að styðja við bakið á þeim sem vilja sækja dómaranámskeið sem í boði eru á vegum KKÍ. Því til viðbótar er mikilvægt að hvetja elstu iðkendur okkar til að koma að þjálfun sem aðstoðarþjálfarar jafnvel þótt þeir hafi ekki öðlast aldur til að stýra eigin æfingum. Þannig læra þeir mest og koma betur undirbúnir inn í þjálfarastarfið þegar réttum aldri er náð.

## Fjáraflanir og aðrar tekjur

BUR rekur og mannar **sjoppuna** á Torfnesi á heimaleikjum meistaraflokks og á ýmsum uppákomum á okkar vegum í húsinu, s.s. þegar umferðir í Íslandsmóti fást hingað heim. Hagnaður af sjoppurekstrinum hefur runnið beint í ferðasjóð iðkenda vegna ferða á Íslandsmót og minniboltamót. Þangað rennur einnig framlag úr Ferðasjóði ÍSÍ en það hefur hækkað með fleiri hópum á Íslandsmótum. BUR niðurgreiddi hverja ferð iðkanda á Íslandsmót um 6.000 krónur í vetur.

Haustsalan á **grænmeti** var á sínum stað og lukkaðist vel. Farið var í eina **kaffipakkasölu** og **batteri í reykskynjara** seld fyrir jólin. **Kaffi** var aftur selt eftir áramót en þar með lauk fjáröflunum síðasta leiktímabils. **Körfuboltabúðirnar** eru ein stærsta fjáröflun sem ráðist er í innan deildarinnar á hverju

ári en minni aðsókn var að þeim 2019 en oft áður. Ein skýring er sú að Afreksbúðir KKÍ fóru fram sömu helgi. Það mun ekki verða í ár. BUR kom einnig að hefðbundinni fjáröflun félagsins í tengslum við hátíðahöld Ísafjarðarbæjar á **17. júní** en það er verkefnastyrkur til félagsins. Þá má nefna að elstu iðkendur félagsins tóku þátt í stærri fjáröflunum á borð við uppstillingu á sal fyrir árhátíð Ísafjarðarbæjar og útskrift MÍ og kvöldvinnu í tengslum við það.

Reglulega er sótt um styrki í Íþróttasjóð og styrktarsjóði UMFÍ og hafa ýmis verkefni fengist styrkt í gegnum tíðina. Einnig er sótt í styrktarsjóð 3X Technology. Þá eru ótalin fjölmörg fyrirtæki og einstaklingar sem styrkja starfsemi yngri flokkanna með ýmsum hætti. Sá stuðningur er ýmist í formi beinna peningastyrkja, vöruúttekta eða aðstoðar við ólík verkefni. Slíkur stuðningur er ómetanlegur og verður seint hægt að fullpakka.

Æfingagjöldin eru innheimt mánaðarlega af iðkendum í 5. bekk og eldri og renna þau til greiðslu þjálfaralauna. Gjöldin duga þó ekki fyrir þjálfaralaunum. Deildin verður af umtalsverðum tekjum með því að innheimta ekki æfingagjöld í yngstu aldurshópunum en benda verður á að í samkomulagi HSV og félaganna var ákveðið að heimila æfingar fyrir íþróttaskólaaldurinn án þess þó að innheimt yrðu æfingagjöld. Slíkt fyrirkomulag gengur ekki til lengdar. BUR mun beita sér fyrir því að einhverjar breytingar verði gerðar á því fyrirkomulagi.

## Samstarf við MÍ um afreksíþróttasvið

Körfuknattleiksdeildin hefur átt gott samstarf við Menntaskólann á Ísafirði um afreksíþróttasvið. Deildin hefur haft milligöngu um að útvega þjálfara á tvær körfuboltaæfingar á viku og hefur Nebojsa Knezevic séð um þær æfingar. Sextán eldri iðkendur körfunnar voru skráðir afreksíþróttasvið í vetur og er karfan fjölmennasta íþróttagreinin þar.

## Landsliðsverkefni KKÍ

Alls komu þrjú iðkendur Kkd. Vestra til greina í landsliðsverkefni í sumar á vegum KKÍ. Bræðurnir Hilmir og Hugi Hallgrímssynir voru í æfingahópi U18 og Gréta Proppé var í æfingahópi fyrir U16. Öll landsliðsverkefni ársins voru slegin af um miðbik Covid-19 og ekki valið í lokahópa. Þegar þetta er skrifað stefnir því ekki í nein verkefni fyrir landsliðskrakka í sumar. Ekki hefur verið tilkynnt um val í Úrvalsbúðir og Afreksbúðir en þær munu fara fram í ágúst. Kkd. Vestra mun eiga fulltrúa í Úrvalsbúðunum og vonandi einnig Afreksbúðum.

## Einstakir flokkar

### **Drengjaflokkur:**

*Þjálfari: Nebojsa Knezevic*

Liðið, sem er skipað leikmönnum fæddir 2001-2004, keppti í 1. deild og bikarkeppni KKÍ.

### **Stúlknaflokkur:**

*Þjálfari: Nemanja Knezevic*

Liðið, sem er skipað leikmönnum fæddir 2002-2004, tók þátt í Íslandsmóti í 1. deild og bikarkeppni KKÍ. Stjórn Kkd. Vestra hefur tekið þá ákvörðun að stefna að meistaraflokki kvenna á næsta leiktímabili. Vonir standa til þess að meistaraflokkurinn reynist iðkendum yngri flokka mikil lyftistöng enda verður hópurninn væntanlega að langmestu leyti skipaður stúlkum sem heyra í reynd undir yngri flokka.

### **10. flokkur stúlkna:**

*Þjálfari: Nemanja Knezevic*

Liðið, sem er skipað leikmönnum fæddir 2004-2007, tók þátt í Íslandsmóti í B-riðli og bikarkeppni KKÍ.



**9. flokkur drengja:**

*Þjálfari: Pétur Már Sigurðsson*

Liðið, sem er skipað leikmönnum fæddir 2004-2005, tók þátt í Íslandsmóti og bikarkeppni KKÍ.

**7. flokkur drengja:**

*Þjálfari: Pétur Már Sigurðsson*

Liðið, sem er skipað leikmönnum fæddir 2007-2008, tók þátt í Íslandsmóti.

**Minnibolti eldri drengja:**

*Þjálfari: Matic Macek*

Liðið, sem er skipað leikmönnum fæddir 2009-2010, tók þátt í Íslandsmóti.

**Minnibolti eldri stúlkna:**

*Þjálfari: Gunnlaugur Gunnlaugsson*

Liðið, sem er skipað leikmönnum fæddir 2009-2010, tók þátt í Íslandsmóti MB10 og MB11.

**Minnibolti yngri drengir (3. og 4. bekkur):**

*Þjálfari: Pétur Már Sigurðsson/Helga Salóme Ingimarsdóttir*

Liðið, sem er skipað leikmönnum fæddir 2011-2012, tók þátt í Sambíómóti.

**Minnibolti yngri stúlkur (3. og 4 bekkur):**

*Þjálfari: Dagný Finnbjörnsdóttir*

Liðið, sem er skipað leikmönnum fæddir 2011-2012, tók þátt í Sambíómóti.

**Krakkakarfa stúlkur (1.-2. bekkur):**

*Þjálfari: Dagný Finnbjörnsdóttir*

Liðið er skipað leikmönnum fæddir 2012-2013. Farið var á Sambíómót.

**Krakkakarfa drengir (1.-2. bekkur):**

*Þjálfari: Sigríður Guðjónsdóttir*

Liðið er skipað leikmönnum fæddir 2012-2013. Farið var á Sambíómót.

Barna- og unglingaráð Kkd. Vestra færir öllum iðkendum, þjálfurum, foreldrum og styrktaraðilum bestu þakkir fyrir farsæla samvinnu á því sérkennilega starfsári sem nú er á enda og bindur miklar vonir við gróskumikið starf á næstu leiktíð.

Ísafirði, 31. maí 2020

Fyrir hönd barna- og unglingaráðs Kkd. Vestra  
Birna Lárusdóttir, formaður